



наведи телефон

# Лүимә сэрипос

15.01.2026  
№ 1 (1355)

www.khanty-yasang.ru

Основана 11 февраля 1989 года

E-mail: gazeta@khanty-yasang.ru



Ишхипың мат-вим-хури

Ты хурит Йильпи тәл ялпың хөтал кастыл нъяврамыт Ханты-Мансийск үст «Югра-Классик» колт мүйлысыт. Тув Ащирма бйка ос Түйт ағи ёхталасбй. Ағиришит ос пыгришит маттем та ёнгалтавёсыт. Ты урыл 3 лөпсыт ловиньтён.

**Ты  
номерт  
ловиньтён:**

«Рувики» намп  
лөпс урыл вәён

► 4

Хүл алышлан  
вәрмал кўцаитн  
уральтаве

► 5

Мәньци, ханты  
колтәглыт вәрум  
суссылтап

► 7

Хаснә мәхум ялпың  
хөталаныл

► 10-11

Пёс вәрмалит

► 12

Йильпи 2026 тәл та  
бвылтахтас

► 14

Нёвлиң, хўлың  
тёнут тыналасыт

► 15



# Мирн пёриим хөтпәт 2025 тәлт юи-өвыл сапрәни вәрыгласыт

**М**өлтә тәлт вәт сәграпнал этпос 23 хөтәлэт округ Думат рүпитан хөтпәт юи-өвыл сапрәни вәрыгласыт. Төнт мирн пёриим хөтпәт ёт округ кұшай Руслан Кухарук ос мөт кұшайт рүпитасыт. Та сапрәнит 8 постановление-нәпак ос 29 сәкконыт урыл потыртасыт, депутатыт тув ләтың хұлтсыт ос тәлат вәрнә мәгыс пирмайтасаныл.



Р. Кухарук, Н. Западнава, Б. Хохряков, В. Семёнов, Е. Айпин

Ань йильпи 2026 тәл ёхтуме кастыл тән сәв-сыр тәлат нупыл хұлтыг-лахтым элалъ рүпитэгыт. Тыи Россия Президентув В.В. Путин 2026 тәл мирыт пуссын акван-юрщхатнә тәлыг ләвыстә. Ты коныпал Югра мәвт Руслан Кухарук 2026 тәл – мәнәлат щәмьят янытлан тәлыг ләвыстә. Ёвләт депутатыт акв нә мәгылт өщнә пөсыл минә мәгыс постановление пирмайтасыт, тувыл 157 элумхөлас ос рүпитан кит колыг – «Почётный грамотал» минә мәгыс.

Тувыл ювле хультум тәл сыс депутатыт пуссын рүпатаныл өвылтыт тән кұшайныл **Борис Хохряков** таи ләвыс: «2025 тәлт мән 12 щёс акван-атхатыгласүв. Та сыс мән 128 сәкконыт пирмайтасүв ос 400 сәвиткем



Мирн пёриим мәхум

постановления. Вәим, тот янгыщ хөнтлан мән ялнә хум хөтпәт щәмьянылн нётмил вәрнә программат өлэгыт. Ань округ прокурорув Дмитрий Попов кит сәкконыг суссылтас, өвыл – тыи НКО колыт хөнтлан мән ялум хум хөтпәтн «реабилитация ос

адаптация» тәлаг порат ос рүпата киснә мәгыс нётуңкве патэгыт. Тувыл сұкыр этпос 2022 тәл-ныл ос сұкыр этпос 2023 тәл мус сәртын хөнтлуңкве кетыглым хөтпәт акв тамле СВО вәрмалын хансавет. Югра янытытыл 40 сыре-сыр нётмил вәрнә хұлтыглан ләтңыт хасвёсыт. Тыи хөнтлуңкве ялнә хөтпәт машинаныл мәгыс нәлок-олн мощца ойтнә мәгыс, кол ұнттын мә минә ос нәвраманыл школат олн ойтнә тәл вос тыттувёсыт, школа әстлам әгияныл-пыганыл элалъ хөт-әти ханищтахтуңкве өвләт вос вивет. Тувыл губернаторув мәгылн тагатан пөсыт «За мужество» ос «За доблесть» вәруңкве ләвыс. Хөнтлан мән

мәнәщи потрыт хаснә журналистыт щәнә ләтңа-ныл вәнэныл мәгыс ань 25 процентныл ойтнә олнаныл сәвитаныл 80 процентыг нөх-лаплаве. Та щирыл ке, мәнәлат хөтпәт щәнә ләтңаныл мәнәтәгыл вәңкве тах-мәгыт, ханищтыяныл ос рүпитаңкве тув минэгыт.

Мөт сәккон хұл алыш-лан ос сәлы үрнә мәхумн нётнә мәгыс щёпитавес. Тувыл соссә хөтпәт писа-лил пәтлуптан, снегохо-дыл ос моторыл яласан мәгыс хотты үсн ман пәвылн ханищтахтуңкве ёхталан порат лөх олн-ныл ювле ойтуңкве па-тавет. Тамле вәрмалит мәгыс округ бюджетныл олн тәставе.

Тувыл депутатыт «Расту в Югре» сәккон ләтың пөнтсыт. Ты элы-пәлт Юграт самын патум кә-сың нәврам мәгыс олн ойтвес. Ань округувт нәврам самын патнә порат щәне манос әще, акв хотты хөтпа Российский Федерацият граждан-ство-нәпак вос ёныщис. Туп төнт нәвраманыл олныл ойтавет. Савалап нәврамыт ханищтахтынә-ныл сыс прожиточный минимум сәвит олн-нёт-милыл ойтуңкве патавет.

Ты коныпал Белояр-ский, Хәльүс, Хөнтаң, Нефтеюганский, Нижне-вартовский, Октябрьский, Советский, Сургутский ос Ханты-Мансийский районытыт ос Югорск үсн пұктотнә кұшайт вәрум рүпатаныл урыл өс тот потыртасыт ос та юи-пәлт вәрнә тәланыл сәккон щирыл пирмайтавёсыт.

**Тамара МЕРОВА**

# Няврамыт нётнэ ховт мувлахи ййквсыт ос ёнгасасыт



Ащирма ойка няврамыт палт ёми



Киселевыт колтәгы

**К**әсың тэлы ват сәграпнал этпос  
оигпан ляпат округ янытыл няврамыт  
«Югорская ёлка» ялпың хөталн Ханты-  
Мансийск үсн атыглавет. Ты ёмщакв  
ханищтахтын ос матыр ёмас тэла вәрнэ  
няврамыт, әтяныл хөнтлын мән миная  
агиришит ос пыгришит, сәв няврамың  
щёмьят яныг үсн вөвиньтавет.

Алпыл ват сәграпнал  
этпос хус щислат агири-  
шит ос пыгришит мәгсыл  
кәтыл матыр ёнгынут  
вәрнэ мастер-классыт  
олсыт. Тувыл Туйтың нэ  
ос тав юртанән няв-  
рамыт ёнгалтавёсыт,  
тән тот хайтыгтасыт, ха-  
ланылт кассыт, ййквсыт.  
Няврамыт халт нётнэг  
масхатым сәвсыр мөйт-  
ныл өлнэ мәхмыт ёмыг-  
тасыт, агиришит ос пыг-  
ришит оманыл-әтяныл ёт  
пөслахтасыт.

Ам тот мәныщи щёмья  
кәсаласлум, ты Дарья  
Павловна Киселева  
(Ромбандеева) хұрум  
нявраманэ ёт Ханты-

Мансийский район Ня-  
лино пәвылныл ёхтысыт.  
Дарья тит пыгаге школат

ханищтахтэг. Яныг пыге  
Егор кадетский школан  
яланты. Ярослав 5 клас-  
сыт ханищтахты. Мәнь  
агирище Лена иңсадыкын  
яланты. Тән тот мөт няв-  
рамыт халт өс ёнгасасыт.

Мәныщи агирищкве  
Мирослава Мальчикова  
Хальүс район Хулюмсұнт  
пәвылныл омагэ ёт ёхта-  
лас. Мирослава школат  
ёмщакв ханищтахты ос



М. Кондин хорамың маснугың аги ёт хайтэг

сәвсыр мероприятият ак-  
ваг кәркамыг нёты, каснэ  
мән яланты. Таимәгсыл  
кәркам агирищкве яныг  
үсн ялпың хөталн вөввес.  
Мирослава щар өвыл щёс  
тамле няврамыт ялпың  
хөталн ёхтыс, тавән сака  
пұмыш олыс.

Тувыл пуссын нявра-  
мыт яныг залн вөввёсыт,  
тот «Югорское сердце»  
нампә мөйт суссылтавес.  
Ты Югрик нампә мәнь  
мәхар-пыгрищ хоккеил  
ёнгыс ос аква матарыл  
хурахлас, хот-түйтхатас.  
Акв порат тав яңклөмт  
тармыл хультыс ос хот-  
таль мөртым мән Афри-  
кан та нәтвес.

Тот обезьяна, жираф,  
зебра, лев, страус ос  
мөт үйит ёт румалахтас.  
Тән халанылт оцмарың  
товлыңуй Какаду пуссын  
үйхулыт такви палтэ лап-  
төварттаңкве тахсанэ,  
Югрик алаты уркуптастэ.  
Тувыл та руманән мәхар-  
пыгрищ нётвес, хот-  
оймалтавес. Югрикын  
тот ёмас кос олыс, ос  
омагэ тәл кәсә сака хо-  
лас, юв таңхыс. Юи-өвылт  
омагэ ёт матьёмас акван-  
хөнтхатсыгостэнти мәтән  
ёхтысыг. Югрик акв тув  
хоккеил ёнгункве вуйвес,  
тав воссыг нэматарыл ат  
пилыс, элалё ёнгыс.

Няврамыт мөйт сус-  
маныл юи-пәлт өс ён-  
гункве вөввёсыт. Та порат  
Ащирма ойка ос Туйт  
Аги ёхтысыг. Агиришит,  
пыгришит аквёет эргы-  
сыт, хөвт мувлахи ййк-  
вим ёмыгтасыт, сәвсыр  
щирыл кассыт. Ялпың  
хөтал оигпам порат пус-  
сын аквёет хурин пөс-  
лахтуңкве лүльсасыт.

Галина КОНДИНА



# «Рувики» нампа лӧпс урыл вӑён

**Ю**вле хультум тӑлт Россия янытыл ӧлнӑ мощцаг хультум мирыт щӑнь лӑтӑнаныл ӗлӑль тотнӑ мӑгыс сӑв тӗлат вӑрвӗсит. Тӑн янгыш ань ищӑйпыӑ утытн тӗлавет ос тох сӑв мӑхумн тах вӑвет. Мӧлты Йошкар-Ола ўст финно-угор мӑхум съезданыл ӧлум порат ты ӧвылтыт лӑххал тотнӑ хӧтпат ӧс потыртасыт.

Тӧнт тӑн «Рувики» йильпи ищӑйпыӑ лӧпс урыл сӑвсыр тӗлат тӑрапаттысыт. Ты ут рӗпататӑ 2023 тӑлныл ӧвылтастӑ, йильпи лӧпс ты ӗлыпӑлт вӑрум «Википедия» ищӑйпыӑ лӧпс холт щӗпитым ӧлы. Ань тув сыре-сыр эксперт-хӧтпат коньпал кӑсыӑ хӧтпа матыр потрыт хансуӑкве ос кӗтуӑкве вӗрми. Тӑн туп экспертытн ӗмщакв уралытан юи-пӑлт тув тӗлавет.

Саранск ўсныл ӧлнӑ хум **Александр Данильчев** «Рувики» намтым интернет-энциклопедия лӧпсӗт эрзя лӑтӑн хансым лӑххалыт уралытыянӑ. Ань такви рӗпататӑ ӧвылтыт тав лӑвыс:

– «Рувики» – тыи ӗлумхӧласн матыр тӗлат ос сӑвсыр хӧтпат ӧвылтыт вӑнӑ порат тув хансым потрыт ман лӑххалыт хӧнтуӑкве вӗрмегын. Таимӑгыс та ищӑйпыӑ лӧпс энциклопедияг лӑваве. Таквсы акван-ловиньтым 25 млн ӗлумхӧлас тув хасхатым ӧлсыт. Тув кӑсыӑ хӧтпа такви наме хӗлтытӑ ке, тав ӧс тув хасхаты ос сӑвсыр потрыт, лӑххалыт ловиньтаӑкве вӗрми.

Тувыл таи пӗмыш, тот сыре-сыр потрыт, лӑххалыт хотты мирыт щӑнь лӑтӑнанылтыл хансым ӧлӗгыт. Ань тыг мус тот руш лӑтыӑ коньпал лӑххалыт 20 мӧт лӑтӑн хансым мӑн толмашлым

ӧлӗгыт. Ам ань нӑнан потыртамум сыс тот 2 млн 148 потрыт руш лӑтӑн хасвӗсит, вӑим, тув кӑсыӑ хӧтал матыр-ӑти йильпииг тӗлаве ос потрыт хотты щӑнь лӑтӑн толмашлавет.

Тыи Россия янытыл ӧлнӑ сӑвсыр мирыт, кос выгӗв, алтайский, башкирский, бурятский, ингушский, калмыцкий, якутский, тувинский, хакаский, чеченский, чувашский, хатанит лӑтӑн.


Финно-угор мирыт халт лӑххалыт вепский, саран ос коми-пермяцкий, карельский (ливвиковский наречиял потыртан карелыт), марийский, мокшанский ос эрзянский, удмуртский щӑнь лӑтӑнытыл толмашлавет.

Кӑсыӑ мир тот щӑнь лӑтӑн толмашлан хӧтпа хӗлтым ӧныщи, тав пуссын потрыт уралытым ловиньтыянӑ ос тувыл уш тув тӗлавет. Марий мӑхум горномарийский диалектыл Надежда Тимофеева потрыт уралытыянӑ, коми лӑтӑн – Марина Федина, удмурт – Светлана Поточина. Мӧт хӧтпат ӗт мӑнавн ӧс вӑйхатуӑкве ӗри, тот тӑнки мӑт ӧщӑ сӑвсыр институтаныл пӑлыл мӑхум рӗпитӗгыт.

Тытӑл мӑн хӧнтлан мӑн ялум финно-угор героит ӧвылтыт потрыт хассӗв ос «Рувики» лӧпсын тӗлсанӗв. Таи ӗмас, тот мӑнки сӑвсыр учӗнян ув ос



В.И. Токтарева, А.А. Данильчев, М.А. Малафеева



«Рувики» лӧпс щӑнь лӑтӑн

спортсменанув урыл потрыт ӧлӗгыт. Ань хотты хӧтпа янытлан мӑгыс нӑн потыр хансуӑкве ӧс вӗрмегын. Ос туп пуссын тӗлат мӗсхалыг тӑрапаттын юи-пӑлт, ты хӧтпа урыл «Рувики» лӧпсын ӧс тӗлаве ос тав сӑв мӑхумн вӑӑкве патаве. Ӗвлӗт потыр ман лӑххал руш лӑтӑн хансӗлӗн, тувыл уш нӑнки щӑнь лӑтӑн ос ӗтыл мӧт хотты лӑтӑн ӗлӑль толмашлаӑкверӧви.

Потрыт коньпал тув сӑвсыр хурит пӧславет. Мӑн ань ты сапрӑниявт нила вӑрмалит тӑрапаттысанӗв ос сӗрӗерыг ӗлӑль тотуӑкве лӑвсанӗв. Ӗвил вӑрмалы, ты мӑнки мирув ӧвылтыт пӧслым хурит акв яныг элект-

ронный корпусн атуӑкве ӗрӗгыт. Кӑсыӑ хури ӗмщакв уралытым вос ӧлыс, ань такви мӑхманӑ пӧс поранытыл мӑк ӧщӑ маснутыл масхатым вос суссылты манос мӧт ӧщӑ пормасанӑ. Ань тыит искусственный интеллект хосыт кисхатым мӧт хаштӑл мӑхум ӗт ул вос тӗлыгтавӗсит. Тӧва ӗлумхӧласыт хотты мирыт ӧвылтыт шар нӑматыр ат вӑгыт ос ищӑйпыӑ ут хосыт кисхатым шар мӧт хурит хӧнтӗгыт ос ӗлӑль тувле агтым та ӧлӗгыт. Тох ӗлӑль ул вос ӧлыс, таи ань мӑнкинӑвн мӗсхалыг щӗпитаӑкве ӗри.

Тамара МЕРОВА

[www.khanty-yasang.ru](http://www.khanty-yasang.ru)

# Хул алыщлан вәрмалъ кӯщаитн уральтаве

**М**олты тал Когалым уст соссa мӕхум яныг конференциян акван-атхатыгласыт. Тонт округут хул алыщлан вәрмалъ щирыл кӯщаитн блнэ хум Руслан Васильевич Романчук ос тув ёхталас. Тав соссa мӕхум элы-пӕлт хул алыщлан тӕлат урыл потыртас.

Округут янытыл ят хул алыщлан вәрмалъ 166 федеральный сӕккон хосыт ургалым бӕншае. Пуссын мӕхум, хотьютыт ят нас няслӕгыт, хулпыт унттӕгыт манос толгӕгыт, тӕн рыбинспекциян акваг уральтавет.

Ювле хультум тӕлт мӕн мӕвт пуссын аквӕт яныг-сӕт вӕт нупыл акв хул алыщлан организацият нӕпакн хасвӕсыт. Тыгыл вӕтнупыл китсоссa мӕхум общинат рӕпитӕгыт. Ты общинат хуланыл элалъ тӕнки тыналыяныл. Тӕн солвалтыяныл, пӕлтыяныл, посымыл восытыяныл манос пӕнка кывырн пиным пӕйтыяныл ос тыналыяныл.

Округут ургалым бӕншэ



Акван-атхатыглам мӕхум

мӕт «заповедникыт» туп хул алыщланкве ат рӕви. Ис мӕт блнэ соссa хӕт-пат тӕнки мӕнанылт, хӕт кӕсӕщӕгыт, тот хул пувуӕкве вӕрмӕгыт. Тӕгт ят хул алыщлан хӕтпат нялк хул вӕт нупыл ат метра пӕлыт толгыл ос хулпыт алыщланкве вӕрмӕгыт. Мӕт хулыт ос нӕлсӕт нупыл ат метра толгыл ос хулпыт пувуӕкве тӕратаве. Лескаӕ хулпыт хул алыщланкве щар ат рӕви. **Руслан Романчук** лӕвыс:

– Ос тох блы, Ас ят толгыл хул алыщланкве щар ат рӕви. Мӕн ты урыл номсахтасӕв, хул алыщ-

лан общинат Ас ят толгыл хул пувуӕкве ос тӕртаӕкве номсыянӕв. Тӕн хул пувнэ тӕлатн яныг тӕрвит ат тотӕгыт. Ань элалъ ты вӕрмалъ нӕпакт мӕсхал щирыл щӕпитыянӕв. Матпалыт толгыл хул пувуӕкве рӕви, акван-потыртахтӕв.

Кӯщай хум ос ты урыл потыртас. Ис мӕт хул алыщлан мӕхум тӕнки хулпаныл палт организациян наманыл вос хансӕгыт. Инспектор хӕт-пат хул алыщлан мӕт уральтым яласанӕныл порат, тӕн хулпаныл тӕра вос кӕсаласаныл. Тувыл ты мӕхум наманыл тӕрапаттын мӕгыс паспорт нӕпаканыл ёт вос тотылӕгыт. Хул алыщлан тӕлат ты урыл ёмщакв хансым блы. Ань ят яласан хӕтпат сӕвынпӕлэ эрнэ нӕпаканыл ёт ат вуйлыяныл.

Руслан Васильевич лӕвме щирыл, хул алыщлан хӕтпат ят хул пувнэ мӕгыс промышленность департамент пӕлыл эрнэ нӕпакыл хасылтавет. 2024 тӕл сыс округут




Р. Романчук

хул алыщлан предприятият пуссын аквӕт он-толовсӕткем тонна хул пувсыт, молты тал ос туп атсӕткем тонна хул аласыт.

Округут кӕсыӕ тӕл хурумсӕткем сӕвсыр организацият хул алыщлан квота-нӕпакыт вуйлӕгыт. Ос тӕва мӕхум тӕл сыс мансӕвит хул кӕтын-патталӕгыт, ты урыл отчӕт-нӕпак ат мыгыт. Тыи мӕгыс ты кӕсыӕ тӕлныл хул пувнэ вӕрмалъ мощцаг ёмты.

Ань хоты хӕтпат алыщлан хуланыл мӕгыс отчӕт-нӕпакыт миӕкве ат патӕгыт ке, тӕн ат сӕтыра сӕвит солкӕви мус штрафолныл пинуӕкве бӕылтавет. Ты коньпал тӕн хулпаныл хот-вивет. Тувыл супыг ос ӕлн хулыг алыщлан мӕгыс сутытаӕкв вӕрмавет. Ты хулыг РФ выгыр нӕпакн хансым блӕг, тӕнатӕн алыщланкве щар ат рӕви.





# Щәнь ләтңанув сәв тәл вос өлэгыт

**Ю**вле хультум  
Этпост Ханты-  
Мансийск үсн щәнь  
ләтңыт урыл потыртан  
хөнтхатыглапын  
Надежда Геннадьевна  
Алексеева ёхталас. Тав  
мөлтү порат «Ханты  
ясанг» ос «Лүймә  
сәрипос» газетаг вәрнэ  
кол тармыл пуңктотыс,  
таквсы Тюмень үсн  
областной Дума  
депутатыг пәриявес,  
ань тот рүпиты.



Надежда Геннадьевна Н.В. Рагимова янытлытэ



В.И. Сподина ос Н.Г.Алексеева

Надежда Геннадьевна  
өвләт мәньщи ос ханты  
газетаг вәрнэ колн щалт-  
сас, мәхум Тюменский  
областной Дума пәлыл  
янытлан нәпакытыл ми-  
санэ, мәнавн яныг щәс  
мүйлуптас. Тувыл хунь  
Всероссийская научно-  
практическая конферен-  
ция «Язык, история и  
культура: от традиции к  
инновациям» өвылтахтас,  
тот өс мәхум янытласанэ.

**Надежда Геннадьевна  
Алексеева** ләвыс:

– «Лүймә сәрипос» ос  
«Ханты ясанг» газетаг  
вәрнэ мәхум округ сасса  
мир мәгыс сәв эрнэ тә-  
лат вәрёгыт, ләтңаныл ос  
пәс йис наكانыл яныт-

ल्याныл, Элаль тотыяныл.  
Мән ань пуссын аквьёт  
акв сака эрнэ тәла вәрёв  
– мәньщи ләтңув ищй-  
пың утын түйлүв. Ань  
ләтңтев акваг өлуңке  
паты, яныгман мәхумн  
ханищтаңке патаве, тав  
нәмхуньт ат сөйми.

Вәт сәграпнал этпост  
округув 95 тәлэ төвлыс.  
Мән сасса мирув мәгыс  
тав өвләт Остяко-Вогуль-  
ский национальный  
округыг намтвес, ётыл  
Ханты-Мансийский авто-  
номный округыг хасвес.  
1993 тәлт Россият өлнэ  
янас мәг ләввес, Консти-  
туция мәк сәккон нә-  
пакын хасвес. Та порат  
округувт Александр

Васильевич Филипенко,  
Валерий Андреевич  
Чурилов ос мөт мұтраң  
хөтпат рүпитасыт. 1989  
тәлт «Югра лылыёп» ас-  
социация вәрвес, күщаиг  
тув Татьяна Степановна  
Гоголева пәриявес. Тувыл  
хунь округув янасыг  
вәрнэ мәгыс мәк эрнэ  
нәпакыл щөпитавес, яныг  
күщаит хасхатаманыл  
порат, тот сасса мирныл  
Татьяна Степановна өлыс.

Округув ань щирет  
өлнәтэ мәгыс, мән сасса  
миранув сәв ёмас тәлат  
вәрсыт. Вөраясыт, хүл  
алыщласыт, Родинав  
мәгыс сәвсыр планыт  
щирыл рүпитасыт. Пөх  
хөтпат тыт ат өлсыт, мә-

витув щөлэ нәмхотьютн  
нәмхотталы ат тотвес, ат  
тыналавес. Югра мәв  
сасса миранувн үргалым  
өщвес, пәс тәгыл ман-  
хурипаг өлыс, та хуритэ  
ань тыхотал мус өлы. Ань  
мә-витув щөлэ – мә-вөй,  
газ, вөре та маныр, туп  
округ мәгыс хунь өлы,  
тав Россия янытыл пә-  
рыс тоты.

Мәньщи, ханты ос  
ёрн мәхманув тәнти пәс  
йис наكانыл янытласыт,  
щәнь ләтңыл потыртасыт,  
мөйтаныл-Эрганыл мәнь  
мәхумн мөйтыгласаныл,  
Эргыгласаныл. Таимәгыс  
мән ань тәнаныл вәганүв,  
нәпакыт ловиньтыянув.  
Матёмас мәньщи ләтңув  
өлы, суйты!

Ань йильпи тәл ты  
ёхты, кәсың хөтпан сәв  
ёмас, сымың ләтың лә-  
вөгум. Округ сасса мәх-  
манув тәнти культураныл  
мәгыс матыр эрнэ тәлат  
вос вәрёгыт, пәс наكانыл  
Элаль вос тотыяныл, ха-  
ланылт юртыңыщ вос  
өлэгыт. Пуссын пүстәгыл  
өлән, ляпа мәхманын,  
рүтанын нөтән! Төрүм ёт,  
Отыр ёт өлән!



Надежда Геннадьевна Г.Р. Кондина янытлытэ



Н.С. Меров почётный грамотал мистэ

Светлана  
РОМБАНДЕЕВА

# Мāньщи, ханты колтāглыт вāрум суссылтап

**Х**анты-Мансийск ўст вāt сāграпнал этпос 18 хōталēt Геннадий Райшев музей колēt «Живая нить традиций» нампa суссылтап рўпитаңкве ōвылтхатас. Союз мастеров, ремёсла центр колт ос Г.С. Райшев музей колт рўпитан мāхум пуссын аквѣёт ты суссылтап щѣпитасыт.

Мāхум янытлаңкве округ культура департамент кўщай нē Маргарита Козлова ёхталас. Өвлēt тав мāщтыр хōтпат янытласанē ос округ кўщай премиял мисанē. Кāсың тāl тох ат мāщтыр хōтпат янытлавет. Ты тāl округ кўщай премиял Хāльўс район Саранпāвылт ōлнē мāньщи нē Наталья Васильевна Албина, Ханты-Мансийск ўст ōлнē ханты хум Вячеслав Юрьевич Кондин, Белярский район Касум пāвылт ōлнē мāхум: Андрей Александрович Ерныхов, Татьяна Филипповна Ерныхова ос Николай Анатольевич Тасьманов майвёсыт.

Суссылтапыт Наталья Васильевна Албина ос Вячеслав Юрьевич Кондин янытлавесыт, Касум пāвылт ōлнē хōтпат яныг ўсн ат ёхталасыт.

Ты юи-пāлт **Маргарита Козлова** суссылтап урыл лāтың лāвыс:

– Суссылтап сака пūмaщиг ōлы, тыт акван-атым пормасыт музейт ат суссылтавет, тāнанылн округ янытыл ōлнē мāньщи, ханты щѣмьят тотсаныл, ты юн ōщнē пормасаныл.



*Н.В. Албина янытлаве*

Геннадий Райшев колт «Живая нить традиций» нампa тēла палт кит суссылтапыт акван-вāрвесыт. Өвыл суссылтап «Семейные реликвии обских угров» намаим ōлы. Сакв я вātат ōлнē мāньщит, Касум, Āс я ос Юган я вātат ōлнē ханты колтāглыт пѣс пормасаныл суссылтаңкве тотсаныл.

Ос китыт суссылтап «Земля Яун Ики» намаявес. Ханты хум Андрей Каюков пōслум хуриянē тот кāсалаңкве рōви. Ты хум хўл алыщлым, вōраим Юган я вātат пѣс йис мāt щѣмьятē ёт ōлы. Такви мāхманē, ōлнē мā-витē хуритн вāтихал пōслыанē.

Ханты хум руш лāтың туп мощ вāгтē, мāхум элы-пāлт ханты лāt-ңыл потыртас.

Ремёсла центр кол кўщай нē **Марина Кабакова** лāтың лāвыс:

– Кит тāl ювле хультум порат мāн рўпатав щирыл Белоярский район Ванзеват пāвылн ялсўв. Тōнт пāвил клубт суссылтап щѣпитāл-вес, тот сāvсыр лильпи, нѣтнē пормасыт кāсаласўв. Мāн ном-сысўв, ты пāвылт ханты мāхум пѣс пормасыт улпыл ат хōнтѣв. Тувыл пāвлың мирыт ёт вāйхатсўв, тāн тāнки пѣс пормасаныл мāнавн суссылтасаныл. Тōнт мāн такем хот-щāгтсўв, насати, Ванзеват пāвылт ōлнē хантыт тāнки пѣс наканыл,



*А. Каюков потырты*

маснутаныл, пормасаныл ўргалым ōньщияныл. Ань мāн Ванзеват мāхум пѣс пормасаныл тыт ōс суссылтыанўв.

**Наталья Васильевна Албина** выставкан пѣс мāньщи пормасыт тотыс. Тав лāвыс:

– Нила пормасанум тыт ōлѣгыт. Тыт ам ōпам тав энтапе суссылтаве. Өпам такви вāрыстē, ётыл ам пыгум Андрей мāгсыл мāниг вāр-вес. Тувыл омам тав мāньщи сагаге, пѣс пальсаке тыт ōс ōлѣг. Омам 1924 тāлт самын патыс, эрың ты турлōпс анѣквамн сагвес, тыи тай ат вāглум. Ос нилыт пормас – тучаң сўнт хўрыгсов. Ам тамле хўрыгсов ань ōс ōньщѣгум, амки юнтсум. Пѣс порат тот мāнь тōрлōмтыт пинвёсыт. Анѣквам пōхлапыт тув пинсанē. Ты хўрыгсов сāлы совыл юнтаве.

Вāt сāграпнал этпос 19 хōталēt «Семейные коллекции обских угров: особенности и подходы» нампa ханищтап ōлыс. Мāщтыр мāхум, музеит рўпитан хōтпат пѣс пормасыт урыл нѣпакытн эрнē щирыл хумус хансуңкве эрѣгыт, та урыл потыртавёсыт.

Геннадий Райшев колт вāрум суссылтап мāньполь этпос оигпан мус рўпитаңкве паты тах.

**Людмила ТЕТКИНА**



### ТӀл котиль Ётпос (Январь)

ПН		5	12	19	26
ВТ		6	13	20	27
СР		7	14	21	28
ЧТ	1	8	15	22	29
ПТ	2	9	16	23	30
СБ	3	10	17	24	31
ВС	4	11	18	25	

### Рётың юсвой Ётпос (Февраль)

ПН		2	9	16	23
ВТ		3	10	17	24
СР		4	11	18	25
ЧТ		5	12	19	26
ПТ		6	13	20	27
СБ		7	14	21	28
ВС	1	8	15	22	

### МӀньполь Ётпос (Март)

ПН		2	9	16	23	30
ВТ		3	10	17	24	31
СР		4	11	18	25	
ЧТ		5	12	19	26	
ПТ		6	13	20	27	
СБ		7	14	21	28	
ВС	1	8	15	22	29	

### ЯныгпӀль Ётпос (Апрель)

ПН		6	13	20	27
ВТ		7	14	21	28
СР	1	8	15	22	29
ЧТ	2	9	16	23	30
ПТ	3	10	17	24	
СБ	4	11	18	25	
ВС	5	12	19	26	

### Яңк нӀтнӀ Ётпос (Май)

ПН		4	11	18	25
ВТ		5	12	19	26
СР		6	13	20	27
ЧТ		7	14	21	28
ПТ	1	8	15	22	29
СБ	2	9	16	23	30
ВС	3	10	17	24	31

### ЛӀпта Ётпос (Июнь)

ПН	1	8	15	22	29
ВТ	2	9	16	23	30
СР	3	10	17	24	
ЧТ	4	11	18	25	
ПТ	5	12	19	26	
СБ	6	13	20	27	
ВС	7	14	21	28	



## Ойттур Этпос (Июль)

ПН		6	13	20	27
ВТ		7	14	21	28
СР	1	8	15	22	29
ЧТ	2	9	16	23	30
ПТ	3	10	17	24	31
СБ	4	11	18	25	
ВС	5	12	19	26	

## Вортур Этпос (Август)

ПН		3	10	17	24	31
ВТ		4	11	18	25	
СР		5	12	19	26	
ЧТ		6	13	20	27	
ПТ		7	14	21	28	
СБ	1	8	15	22	29	
ВС	2	9	16	23	30	

## Сукыр Этпос (Сентябрь)

ПН		7	14	21	28
ВТ	1	8	15	22	29
СР	2	9	16	23	30
ЧТ	3	10	17	24	
ПТ	4	11	18	25	
СБ	5	12	19	26	
ВС	6	13	20	27	

## Мӄнь таквс Этпос (Октябрь)

ПН		5	12	19	26
ВТ		6	13	20	27
СР		7	14	21	28
ЧТ	1	8	15	22	29
ПТ	2	9	16	23	30
СБ	3	10	17	24	31
ВС	4	11	18	25	

## Яныг таквс Этпос (Ноябрь)

ПН		2	9	16	23	30
ВТ		3	10	17	24	
СР		4	11	18	25	
ЧТ		5	12	19	26	
ПТ		6	13	20	27	
СБ		7	14	21	28	
ВС	1	8	15	22	29	

## Вӄт сӄграпнал Этпос, вӄти хӄтал Этпос (Декабрь)

ПН		7	14	21	28
ВТ	1	8	15	22	29
СР	2	9	16	23	30
ЧТ	3	10	17	24	31
ПТ	4	11	18	25	
СБ	5	12	19	26	
ВС	6	13	20	27	

# Хаснэ мӕхум ялпың хөталаныл

**Т**ӕл котиль этпост 13 хөталэт Россия янытыл кӕсың тӕл ляххал хаснэ мӕхумыт ялпың хөталаныл ёмты. Руш лӕтӕыл «День российской печати» нам бӕнщи. Ты тӕл «Лүймә сәрипос» мӕнщи газета 37 тӕлэ тӕвлы. Тыт мӕхумыт щӕн лӕтӕыл потрыт хансӕгыт. Мӕн газетав Югра янытыл мӕнщи хөтпат палт тотаве. Газетав нӕпакын хансым бӕлы, тувыл ишхйпың утыт бӕлы. Мӕнки потранув ловиньтыянув ос ишхйпың утын пиньянув.

Газетат онтолов государственный темат бӕлӕгыт. Мӕн щӕн лӕтӕыл ляххалыт, кӕщаит рӕпатыл, ханищтапыт, мӕвит ургалан вӕрмалит, мир пусмалтан вӕрмалит, каснэ вӕрмалит, сосса мир культура ос сӕвсыр урыл потрыт хансӕв. Ам ань мӕнщи газетат тӕлохса рӕпитӕгум, тувыл тыт рӕпитан кӕркам хөтпанув урыл потыр хансӕгум. Нӕн ань элал лавиньтӕлын.

Мӕн кӕшаюв **Галина Рудольфовна Кондина**. Тав главный редактор вӕнӕн хөтпаг рӕпиты, тох потыртас:

– Ам Хӕльӕс район Саранпӕвилт самын патсум, Хорыңпӕвилт яныгмасум. Ты пӕвил Саранпӕвил лӕнхаль атпан вӕрстат бӕлы. Пӕвлум сака хосат бӕлы. Мӕн тувыл Саранпӕвилн ялантасӕв, тот интернатта ханищтахтасӕв. Ань пӕвлумт та мӕхмытыл нӕмхөтпа атим, пуссын яныг хөтпат атимыг ёмтсыт. Мӕннув хөтпат мӕт мӕн вӕнтласыт, ань акв хум бӕлы.

Ам рӕтың юсвой этпост нӕлолов хөталэт 2001 тӕл порат газетан ёхтысум рӕпитаңкв. Ӑлпыл ханищтахтӕгум, тувыл ханищтахтын мӕныл ӕстӕгум, тӕра тыг хӕйтӕгум. Та порат мӕн потрыт кӕтыл хассӕв. Кит

хөтпаг рӕпитасыг, тӕн мӕн потранув компьютерн хассыг. Мӕн редакцият тасӕвит компьютерыт ат бӕщӕв.

Газета вӕрӕв, потрыт акван-атыянув. Ам тӕнт ответственный секретариг рӕпитаңкве вӕввӕсум. Та порат дискетат бӕлсыт. Мӕн дискетан потрыт хансӕв ос хурит тув пуссын вӕрӕв. Тувыл ам дискета ёт типографиян минӕгум. Тотакв нӕ бӕлыс, мӕн газетав ёт акваг рӕпитас. Ам ляпан унтӕгум, тувыл нӕ комьютер тӕра потрыт щӕпитыянӕ. Тӕнт газета кӕсың сӕт вӕрсӕв. Ань щирыл хунь, тӕнт мӕн лӕглыл хӕйтыгтасӕв, сака тӕрвитың бӕлыс.

Мӕн газетавт **Светлана Матвеевна Ромбандеева** сӕв тӕл рӕпиты. Тав ань ответственный секретариг рӕпиты, тох лӕвыс:



Хаснэ хөтпат газетаныл сунсыглыяныл



Г.И. Дунаева, Л.И. Теткина, Т.С. Мерова, Г.Р. Кондина, Н.С. Мерова

– Ам Хӕльӕс район Лӕпмус пӕвилт самын патсум. Ӑвлӕт ишколат амки пӕвлумт ханищтахтасум. Тувыл мощ яныгнун классыт Кульпас пӕвилт интернатта бӕлсум. Тот сӕв мӕнщи нӕврамыт мӕнщи пӕвилтныл ханищтахтасыт. Кульпас ишкола 1989 тӕлт ӕстаслум, тувыл элал ханищтахтасум. Ӑвлӕт училищат, ётыл Ханты-Мансийск уст Нижневартовский институтыт ат тӕл ханищтахтасум. Мӕнщи газета редакцият налыман нупыл нила тӕл рӕпитӕгум. Ам тыг 1991 тӕл порат ёхтысум, та пӕсныл тыт рӕпитӕгум. Тыт сӕв мӕнщи мӕхумыт рӕпитасыт. Ань тӕват пӕхыминасыт, тӕват атимыг

ёмтсыт. Мӕн, газетат рӕпитан хөтпат, мӕнщи мӕхманув урыл потрыт хансӕв. Хөт бӕлӕгыт, тӕн палтаныл ялантӕв. Тӕва мӕхманув щар мӕн пӕвилт бӕлӕгыт, тӕнаныл тӕра-паттыянув ос хөт бӕлӕгыт, кинсыянув.

Мӕн таңхӕв, мӕнщи лӕтӕув ос мощ вос бӕлы. Хумус оманув-ӕтянув, анӕкванув-ащӕйканув, щӕщӕкванув-ӕпанув потыртасыт, та лӕтың элал тотылӕв. Мӕн хансӕв, тӕва потранув ловиньтыянув, тувыл ишхйпың утын пиньянув. Номсӕгум, ты щар ӕрнэ тӕла. Мӕхманув мӕнщи газета вус ловиньтыяныл. Пӕс кӕт, пӕс лӕглыл вус бӕлӕгыт!

**Тамара Сергеевна Мерова** редакторыг рӕпиты:

– Ам Саранпӕвилт самын патсум ос сӕт тӕл мус увшим ос каңканум ёт Хӕслӕхт янмалтавӕсӕв. Тот омагум-ӕтягум, щӕщӕквӕм-ӕпам бӕлсыт. Ос школан миннӕв порат Саранпӕвилн тотвӕсӕв, тот анӕквӕв бӕлыс.

1987 тӕлт ишкола ӕстынӕм порат Тюмень уст телеграфистыг тӕл ханищтахтасум ос кит тӕл телеграфистыг рӕпи-



тасум. Ётылнув Санкт-Петербург үст Лүймә институтта хаништах-тасум. Ос 1995 талныл Ханты-Мансийскат Ас-угорский институтта ху-рум тал рүпитасум, тувыл тыг газетан вөввёсум. Тыт 1999 талныл рүпитэгум. Потранув өвлэт хаснэйивыл нэпакн хас-санүв, ётыл уш мәнки печатайтаңке патсүв. Компьютерыл рүпитаң-ке а́нумн кү́пнит о́лыс.

Тонт маныщи павлытын ялсүв, тот савнув маныщи-янув щань латңыл ёма-щакв потыртасыт. Таи люль, диктофонанувт сав потрыт ат ләпёгыт ос та потрыт мотаныг пёнты-янүв. Тасавит маныщи хөтпанув турсуяныл ат та хульсыт. Тан потраныл пёс газетан хансым о́лэ-гыт. Ань павылн ёхтэв, мән ётув руш латңыл по-тыртэгыт, та потрыт тол-машлыянүв.

**Людмила Ильинична Теткина** редакторыг рүпиты:

– Ам Хулюмсүнт павылт самын патсум, тот яныгмасум. Ишкола а́ст-ламум юи-пәлт Санкт-Петербург яныг үст А.И. Герцен на́мпа лүймә ин-ститутта хаништахтасум. Ам специальностюм нъя-рамыт маныщи латңыл хаништан хөтпаг ләваве.

Маныщи газетат 2001 тал рётың юсвой этпосэ пәсныл рүпитэгум. Ам о́выл потрум Дом народ-ного творчества колт о́лум суссылтап урыл о́лыс. Газетат рүпитан ма-хумыт лавсыт сас хуса-пыт урыл ляххалыт хан-суңке. Ам шар сымын рөвнэ командировкам Хулюмсүнт павылн о́лыс. Тот Уй ййквнэ вәрмалъ ёмталас. Тамле вәрмалъ ам яныгмам павлумт о́лыс. Та пәсныл воссыг тамле тэлат ат о́лыс. Та порат яныг маныщи ма́хумыт

щань-а́ш латңыл ёма-щакв потыртасыт. Мән пёс йис тэлав сака ёмашакв вәсаныл. Саль, хурит ат арыгтасыт, та порат тамле лильпи телефоныт а́тим о́лсыт.

Рүпата а́нумн сака ёмас. Тыт мән акваг ма́ху-мыт ёт потыртэв, коман-дировкан ялантэв. Тувыл Россия янытыл яласэв. Ханты-Мансийск үст савсыр вәрмалит о́лэгыт, та урыл хансэв.

Мән рүпатав сака та-кыш мот хурипаг ёмтыс.



Газета вәрнэ ма́хум о́выл редактор э́ква Мария Кузьминична Волдина ёт пөслым о́лэгыт. 2024 тал, Ханты-Мансийск үс

Ам хунь о́вылтахтасум рүпитаңкв, мән катыл хассүв. О́влэт маныщи латңыл хансэв. Ётылнув потранув руш латңыл толмашлаңке патсанүв. Китыт тал газетав лови́н-тылүв, тувыл ищхыпың утытна пинылүв. Мән ищхыпың лөпсув «Ханты Манси Мир» нам о́ныщи, тот о́с ляххалыт хансэв. Потранув лови́н-тым щань-а́ш латңув лылыңыг о́лыс. Ищхыпың ма́т э́лум-хөласыт вөрмёгыт хунт-луңке, хумус маныщи латың суйты. Газетат хан-сэв акв щирыл, тувыл потыртэв мот щирыл. Номсэгум, э́рың манылат ма́хумыт латың ханиш-таңке тахмаёгыт.

**Николай Савельевич Меров** газетат коррес-пондентыг рүпиты, тох лавыс:



В.В. Узель, Т.С. Меров, С.М. Ромбандеева, С.С. Динисламова, В.И. Мехнин, Г.Р. Кондина

– Ам самын патсум Халь-үс районыт Саранпавылт. Яныгмасум Хөслөх павылт, тот о́мам ос а́шум о́лсыг. Мән щёмыявт сәт нъярам – нила а́ги, хурум пыг. Ишкола а́стласум, тувыл лусытаңке ялсум, кит тал Москва үс пөхыт лусытасум. Тувыл э́лаль Санкт-Петербург үст кина пөслын хөтпаг ханиш-тахтасум. Китыт тал тот хаништахтасум, тувыл ха-ништахтын ма́м хульту-таслум.

Ханты-Мансийск үсн рётың юсвой этпост 2001 тал порат ёхтысум, та́ра маныщи газетат рү-питаңке патсум. Тох рүпитым тувыл 2014 тал порат ЮГУ колт лях-хал тотнэ хөтпаг ханиш-тахтасум. Университет а́стаслум, та пәсныл тыт та рүпитэгум.

Мән палтүв **Анна Николаевна Алгадьева** рүпиты. Тав Кёрасколыңъя павылт Са́пса районыт Свердловский областьт яныгмас. Анна Лүсум маныщи латың ёмашакве вәгтэ. Ишкола а́стлым порат Ханты-Мансийск үст ЮГУ колт хаништах-тыс, тувыл газетат рүпи-тас. Ань Хулюмсүнт па-вылт о́лыс. Пу́маш мөйтыт, потрыт ос ляххалыт кёты.

**Василий Игоревич Мехнин** маныщи газетат 2019 тал пәсныл рүпиты. Тав Санкт-Петербург үст самын патыс. О́матэ Восыңтүр павылныл о́лыс.

Василий школа а́стламе юи-пәлт о́влэт Санкт-Петербург үст колледжит ищхыпың ма́т рүпитан хөтпаг хаништахтас. Ётыл Ханты-Мансийск үст о́лнэ ЮГУ кол а́стлас. Ань тав газета вәри, лөпсыт щёпитыянэ. Василий сака кәркам хум, рүпитаңке хасы, ма́навн акваг нёты.

«Лүймә сэрипос» га-зетат рүпитан ма́хум ма́тьёмас маныщи латңыл ми́рув о́вылтыт потрыт, ляххалыт хансэгыт. Га-зетат рүпитан хөтпат ялпың хөталыл янытлыя-нум! Пус кәт, пус ләгыл вос о́лэгыт!

Галина ДУНАЕВА

# Пёс вәрмалит

**А**м өлнэм палытыл акваг пёс вәрмалит ханищтэгум. Щәнягум-ащәгум яныг хөтпаг өлсыг, тән пёс вәрмалит ёмщакв вәсанән, мәнав, нйврамыт, өс ташир өлуңкв ханищтасанән. Элнаң тох ёмтыс, рүпатам щирыл өс акваг сәвсыр пёс өлум вәрмалит ёл-хансэгум, мөйтыт, амщит, эргыт, сәвсыр ләттальпит мәхмытыл өс акваг атэгум.

Аквнакт ам Няхщамвөль пә-вылн ялсум, тот Тимофей Константинович Самбиндалов ёт хөнтхатыгласум. Ты яныг хөтпа сәв пёс өлум вәрмалит вәг. Тимофей Константинович тав такви Яныг-пәвилт самын патыс, яныгмас. Ань пыл щәняге-ащәге өлум кол хот ат ёрувлытэ, Экватэнтыл вәтихал пәвлән ялантэг, тот өлэг, хүл алыщ-лэг. Нас өлнэтән порат Няхщам-вөль пәвилт өлэг.

Тимофей Константинович ёт пашалахтын вәрмалы урыл потыр-тасмән, ам китыглахтэгум:

**– Хунь мөт пәвилтныл мүй мәхум ты ёхты, та колың мәхумн лялыт кон-квәлапаңкв ат рөви?**

– Кон-квәлуңкв лялыт ат рөви.

**– Тай манрыг ат рөви? Ат вәглын?**

– Тай - ат вәглум. Вәглум, кон квәлуңкв ат рөви.

Таи вәглум, хунь ащум ялантәлы акит палт, ащум юв ат щалтнә мус щәнюм өс кон ат квәлы.

Кос мөт Нәй-Өтырың мәхум ёхтэгыт, өс аквтох. Пёс мәхум Пёс, маныр ёт тотыглэгыт. Тох хунь ялэгыт. Таимәгыс, лялыт кон-квәлуңкв ат рөви. Мөт Нәй-Өтырың мәхум Пёсың-лүтың тагыл ялэгыт, таи-

мәгыс лялыт кон-квәлуңкв ат рөви.

**– Тувыл мүй хөтпа юв щалты, маныр вәри?**

– Тән май пёс мәхум хумус - сартын кол сәм нупыл пуңкпины, тувыл ущ пашалахтэгыт.

**– Нас пуңкпины? Сөс мәтыр нәмәтыр ат косамты?**

– Сөс тай колың мәхум косам-тэгыт. Юв щалтуңкв – щалтэгыт, кол-сәмт пуңкпинэгыт, тувыл ущ пашалахтэгыт. Ташир ты.

**– Ос тувыл кон минуңкв паты, маныр вәри?**

– Ос аквта щирыл пуңкпины, тувыл та мины. Кәсың кол такви Нәй-Өтыр оныщи. Минуңкв паты өс пуңкпины, тувыл мины.

Пёс мәхум ташир өлсыт. Ань тай руц Төрүмн патсүв, ташир хунь өлы.

Туи Тамара Семёновна Мезенцева, Ягрим пәвилт өлнә яныг Эква ёт, Кимкъясүй пәвилт хөнтхатыгласум, тав сәвсыр пүмаш потырт потыртас.

Потыр халт сәвсыр ләттальпит өлэгыт, ам тәнаныл янас ёл-хассанум:



Т.К. Самбиндалов витвөңха пасаты



Мәньщи сүмьях



Т.К. Самбиндалов агпанэ ёт пөслувес

1. Нёлме витын ат ханаве, такем та луйги.

Тай потрың хөтпа тох ләваве.

2. Сүпын ман мётың, ат потыртэгын?

Сүпнелум тәл ос Эссамтан хөтпа тох ләваве.

3. Наң ман рициг ёмтсын, ависүнтыт хот лүлөгын, пәг-минән! Наскассыг рищ ләвуңкв ат щёпили, савалап хөтпа урыл ос нуса хөтпа нупыл тох ләваве.

Хотьют юв щалты, ависүнтыт ке лүли, тох ләваве.

4. Самаге аңыт хурипаг, щар нас тэгыг-аег.

Кантың хөтпа тох ләваве.

5. Нәмхотьютын ул саралахтән. Лүль ләтың ул ләвен.

Матум хөтпа ке, нөх-түщтәлан,

Полхың нйврам ке, полхе хот-сэгумтәлан.

Тамара Семёновна ләви: «Ань руц халн тэлыгласүв, ты вәрмалит хот-ёрувлахтуңкв та патсыт».

Пёс вәрмалит хот ул вос ёрувлахтасыт, ам таимәгыс нэпакын та хассанум. Эрың, хотты нйврам, хотты хөтпа ты вәрмалы пуңкын выгтэ, Элалы тотуңкв патытэ.

**Анна АЛГАДЬЕВА**



# Мāньщи хум лēккарыг кос ханищтахтас ос мōт мāt рӯниты

**Х**альүс район Саранпāвилт ълнэ пыг Сергей Анямов урыл ам ань хансэгум. Сергей Петрович туи «Мāнь Ысквет» нйврамыт касуңкве ханищтасанэ, ёнгалтасанэ. Мён тав ётэ мощ потыртасмён.

Щёрти яныг таквс этпос 1992 тāлт Саранпāвилт самын патыс. Иң мāнь 5-6 тāl яныт порат тав кыгшияге ёт каснэ мāн ялантаңкве патыс. Тот Андрей Дорофеевич Филиппов нйврамыт сун ұлтта поргуңкве, тыньщан рёпыгтаңкве, мāнь сāграп пāхвтуңкве, йивѡвил ёт хайтуңкве ханищтыанэ. Тох Щёрти мāнь тāгыл хайтыгтас, поргащлас, тākсарыг яныгмас. Саранпāвилт школа āстлас ос Ханты-Мансийск ұсн лēккарыт колн ханищтахтуңкве минас. Тот тав фельдшерыг ханищтахтас.

Школат ос медакадемият ханищтахтамет, акваг каснэ мāн ялантас, тāн тот мōт нйврамыт ёт хōт-āti Россия янытыл касуңкве тотыглавёсыт. Сергей акваг нōх-патыглас, сāv щёс сун ұлтта порыгмаңкве вёрмыс. Мастер спорта нам мāгсыл тав эрнэ сāvит щёс порыгмас ос мансāvит эри, хайтыс. Акваг Россия сборный мāгсыл āгит-пыгыт ёт касуңкве ялантас.

Вōртур этпос 2024 тāлт мастер спорта намыл майвес. Сергей хунь колледжит ханищтахтын мāныл āстыс, тав Белоярский ұсн минас, тот «Газпром» колыт ўргалан



Сергей спортсменыт халт котильт лйли

хōтпаг рӯпитас. Ты урыл тох потыртас:

– Ам лēккарыг ханищтахтын мāныл āстысум ос рӯпитаңкве минасум. Манрыг лēккарыг ат патсум, ат вāглум, тāра охранат патсум рӯпитаңкве. Белоярский ұст ѡлсум, каснэ мāн ялантасум, Россияв мāгсылаквагкасум. 2008 тāлт рекордсменыг ѡлсум, 700 сāvит щёс сун ұлтта порыгмасум, тувыл сāt тāl юи-пāлт мōт хотьют тыгыл сāvнув порыгмас.

Мōлты тāl амти самын патум ос яныгмам пāvлумн Саранпāвилн ёхтысум, тыт Детско-юноше-

ский центрыт нйврамыт ёт рӯпитэгум. Мāн туи пыгыт ёт нёрн ялантэв, тот нёралатын хāхсэв, āхвтасыт халт ёмыгтаңкве ханищтыанўв, вōрт хумус тāнтинāнылн вит пāйтуңкве, тэнут вāруңкве ханищтыанўв. Янгыщ нāй пāлтуңкве вос хāсэгыт. Нёрт турапыг, вōтыг ёмталы. Тэлы ѡс нёр нуыл тотыглыанўв, карыс сыпныл тахсэв. Тэлы порат нёрт манос вōрт яласаңкве вос хāсэгыт.

Туи «Мāнь Ысквет» āгирйщит ос пыгрищит ёт сāvсыр касылыт вāрыглэгум. Тāн тыт хайтыгтэгыт, халанылт касэгыт, ён-



А.Д. Филиппов ос пыгыт нёрн ялсыт



С. Анямов лēккарыг ханищтахтас

гилыт вāрыглэв. Тыньщан пāхвтуңкве ханищтыанум.

– Сергей Петрович, наң мāньщи лātңыл потыртаңкве хāсэгын? Матыр эрың мāнь пораныл номёгын.

– Ам ѡпам Анямов Владимир Степанович ѡлме палыт нёрт сāлыт ўрим яласас, совхозт акваг рӯпитас. Тувыл пенсиян патыс, Саранпāвилт ос Хōрыңпāвилт ѡлыс, тот акваг хўл алыщлас.

Ам номилум, мāнавн мōйтыт мōйтыглас, мāн ётув мāньщи лātңыл потыртас. Тав руц лātңыл потыртаңкве сака ат таңхыс. Ань тав потранэ, тōва лātңанэ номылматыглыанум. Ам тōнт иң мāнь ѡлсум, сāvыңпālэ ат номилум.

Сергей Петрович кārкам пыг, нйврамыт ёт рӯпитаңкве хāсы, акваг тāнаныл ёнгуңкве вōвиянэ, такви тāн ётаныл хайтыгты. Тавён мāн пустāгыл ѡлнэ лāтың тетэв, сāv нйврам тākсарыг ѡлуңкве вос ханищтыанэ.

С. Анямов тегум хурит



# Йильпи 2026 тәл та Өвылтахтас

**Й**ильпи 2026 тәл ёхтуме элы-пәлт  
мән газетавн мәнщи хөтпанув  
свонитёгыт манос пицма кётёгыт ос тәнки  
оманыл-әтяныл, рүтаныл янытлыяныл. Ань  
тән кётум ләтңаныл тыг хансыянүв.

**Елена Саратина**, Белоярский үст өлнэ нэ, таи хансыс, тав Валентина Дорофеевна омаэ ос Дима әпшитэ, Надежда Константиновна Захарова әкве ос Ягрим пәвилт өлнэ Саратиньт колтәглыт, мөт үсыгт өлнэ Светлана ос Ирина Каркочевич әңквагияге, Белоярский үст өлнэ Оксана Сидак увшитэ ос Клара Константиновна Пуховец әкве, Вадичуповыт ос Волковыт рүтанэ йильпи Өвылтахтам тәлыл янытлыянэ. 2026 тәлт тән пуссын пустәгыл вос өлэгыт, матыр тахнэ номтаныл ёмас тәлаг вос ёмтэгыт, сәв щәгт ос шунь вос Өнщёгыт. Кәсың хөтал посыңыг ос рёгыңыг вос Өлыс, тәнки вёщкат хөтпат ёт аквёет юртыңыщ вос Өлсыт!

Ханты-Мансийскат өлнэ ягыгыт **Сергей Хозумов, Иван ос Алексей Гындыбиныг** тәнки оманыл Тамара Егоровна Гындыбина (Хозумова) 2026 йильпи Өвылтахтам тәлыл ос мөт ялпың

хөталытыл янытлыяныл. Тән тамле ләтың ләвсыт: «Ятил омакёв, наң ань әти мән пөхавт өлэгың ос сыманувтнаң аквагляпат! Мән наң рёгың ос эрупсан хосытыл аквписыг тыт өлэв! Ань йильпи тәл ёхтуме кастыл мән, пуссын нъявраманын, наңын янытлылүв! Тәксарыг ос пустәгыл өлнэ элумхөласыг өлэн, пуссын мөт сәвсыр тәлат мән мәнки наң мәгсылын вәриянүв. Мән наңын сака эруптылүв ос үргалым Өнщилүв! Сынумтылүв ос аниглылүв. Наң пыганын».

Ханты-Мансийсканыл **Мария Сергеевна Меровва** такви нъявраманән ос апганән, рүт ос юрт мәхманән паща ләтың Өс кёты. Тән Саранпәвилт, Сүкырьят, Ягримт, Тюменит ман мөт үсытыт, пәвлытыт өлэгыт. Ювле хультум тәлт кит рүтаге 70 тәлэн төвлыс, тьи сүкыр этпос Өвыл хөталэт Галина Павловна Кокорина (Мерова) Саранпәвилтныл ос Сүкырья пәвилт өлнэ



М. Алгадьева, И. Каркочевич, В.Д. Саратина

Елизавета Ильинична Сайнахова (Вьюткина). Елизавета Ильинична вәт сәграпнал этпост лов хөталэт, округув нам хөталэт, самын патыс.

Мария Сергеевна пуссын рүтанэ ос мәнщи мәхум ялпың хөталыл янытлыянэ, элалы өлнэ посың хөтал нупыл пөйкщим пустәгыл пуссын вос өлэгыт, нәмат тәр-

вит ос лөль накыт ул вос ёмталэгыт, хөнтлан вәрмалы ёл вос пөилттавес ос сәв мирыт тәнки халаныл юртыңыщ вос Өлсыт!

Мән редакцият рүпитан хөтпат, мәхманув пуссын Өс янытлыянүв! Пус кәт, пус ләгыл! Төрүм ёт, Нәй-Өтыранув ёт!

**Тамара МЕРОВА**



Сергей Хозумов, Алексей ос Иван Гындыбиныг



Лена, Дима, Валентина Дорофеевна ос Вика



# Нёвлиң, хулың тэнут тыналасыт

**К**асың тал ват саграпнал этпос округу янытлан хотал кастыл Ханты-Мансийск уст «Товары земли Югорской» намба яныг суссылтап щёпиталаве. Мёлты тал округу янытыл өлнэ махум ватыт щёс тыналахтуңке үсн вёвыглавёсыт. Нила хотал сыс махум савсыр атың тэнут, нётнэ пормасыт тот тыналасыт.



«Няrsa» ос «Потум союм» махум

Сосса махум хулыл, нёвлил вэрүм тэнутаныл ос тув тотыгласыт. Тән халанылт «Рахтынья» намба община ылыс. Тот рүпитан хум **Андрей Николаевич Мироненко** таи потыртас:

– Мән общинав сав тал Хальүс район Кульпас павылт рүпиты, кұщаиг Александр Игоревич Голошубин ылы. Суссылтапын мән хулыл, нёвлил вэрим тэнутанув тотсанүв. Сортыт, нялкыт, сорхыт пайтыянүв ос пәнкан пиныянүв. Хул ос нёвиль сакватыянүв, тох тыналыянүв. Тувыл палиңнянь вэрёв. Мән Кульпасныл вездеходыл йисүв, тэлы лёңх иң ат вэрвёс, мансавит тэнут тув лāпыс, таи тыг тотсанүв. Мән касың тал тыг ёхталэв, махум тэнутанув сака ёвтэгыт, акваг китыглахтэгыт. Овыл хө-

талэт хуланув, нёвлянув пуссын тыналасүв.

Ань общинавт 15 арыгкем элумхөлас рүпитэгыт, тән халанылт савыңпālэ сосса махум. Хул алыщлан порат мән павылквет өлнэ хөтпат мәнки палтув рүпитаңке вёвиньтāлыянүв.

Юи-өвыл тāлыт Тāгт ят витэ сака яныг ылыс, тыимāгсыл мощца хул пувсүв. Витэ мāниг хунь ёмтыс, тōнт хул алыщлаңке ат рөвыс. Тох кит манос хурум тāлыт ылыс. Юи-өвыл тāлт нялк ос мощца пувёв.

«Рахтынья» общинат рүпитан хум китыгласлум, тән пākвыл ос пилыл савсыр тэнут вэрёгыт?

Хум ювле лāвыс:

– Пил ватуңке, лāхыс, пākв атуңке ат ялантэв, мән өлнэ мāvт тасавит пил ат яныгми. Акв тал



«Рахтынья» общинат рүпитан хум А.Н. Мироненко

сав пил ылы, мōтыт тал шар ат тэлы. Тыимāгсыл пилыл матыр тэнут ат вэрёв. Та порат хунь пил сав тэлы, пāvлың махум мән палтув тāнки тотэгыт, мән олныл ойтыянүв ос тэлы элаль тыналыянүв. Ань округ янытыл сав общинат пилыл савсыр тэнут пайтэгыт, мән хулыл ос нёвлил тэнут туп вэрёв.

Белоярский район Касум павылт өлнэ махум тэнутаныл тыналаңке ос ёхталасыт. Ханты нэ Анна Степановна Истомина «Потум союм» (Пōлям сōюм) намба общинат кұщаиг ылы. **Анна Степановна** общинатэ урыл лāвыс:

– Мән ат тал сыс рүпитэв, общинав 2020 тāлт вāрыслүв. Тамле суссылтапын ылы щёс вөввесүв. Мән Касум павыл ляпат хул алыщлэв, вөрәев ос лāхс атэв, пил вātэв, тох олн сэлэв. Хуллор павыл ляпат вөрколэты оньщэв.

Общинав мән сāt хөтпа рүпитэв, мәнки халувт пуссын рүтыг өлэв. Ты тал мән 90 тонна хул элаль тыналасүв. Ань таи үрөв, тэлы лёңх хунь вэрәев,

тōнт 40 тонна хул тах элаль тотэв. Хуланув, пиланув Ханты-Мансийск уст тыналыянүв, тот элаль тэнутыг вэрәев. Хурум тал сыс тув кётыянүв.

Ань хул, нёвиль ос ханты пормасыт тыналаңке тыг тотсүв. Суссылтапын мән Ямал мāныл тувыл ёхтысув, лёңхув сака хоса ылыс.

**Зоя Никоновна Тарлина** ос Касум павылныл ылы. Тав «Няrsa» намба общинат рүпиты. Нэ таи лāвыс:

– Общинав «Няrsa» («Пос») намаяслүв. Тох ыкам тав ыпарищ наме пёс порат ылыс, тох Тарлиныт ханты лātңыл лāввёсыт. Общинав мән 2022 тāлт вāрыслүв, нила хөтпа рүпитэв, халувт ос пуссын рүтыг өлэв. Мән ханты пормасыт юнтэв, савсыр сувенирыт, аньщарыт ёргёв, пил вātэв, лāхыс атэв, тох олн сэлэв. Тамле тыналахтын вэрмалитн ылы щёс вөввесүв. Махум татем пүмщалахтэгыт, ёвтхатэгыт.

Людмила ТЕТКИНА

# «Тандора» үшләхтын мәт нъяврамыт сәвсыр тәлан ханищтавет

**Х**альүс район Саранпавылт саран нә Марина Владимировна Керцер, такви әги бпарищ наме Артеева, блы. Тав «Оленёнок» нампa мән нъяврам колт воспитателиг рүпиты. Нә Саранпавылт самын патыс, тот яныгмас. Тав щәняге-әщәге холът пәс йис өлнә-хүлнә тәлат элаль тоты. Ты саран нәкве мәнәвн такви блупсатә ос рүпататә урыл потыртас.

Сартын щәмьят сәв нъяврамыңыт өлсыт. Тав әтәтә Владимир Алексеевич Артеев, саран хум, тән Саранпавылт кол-тәгланылт сәт нъяврам өлсыт. Ома тә Светлана Павловна, такви бпарищ наме Рокина, ос сәлыңколт лов нъяврам яныгмасыт. Тав ома тә сартын хотталы шалтыс.

Таимәгыс Светлана Павловна школа әстламе юи-пәлт элаль ат ханищ-тахтас. Мән әпщиянә ос йигрищанә үргалым юн өлыс. Тувыл хум вәрыс. Ойкатә өт Саранпавылт өлуңкве патыс, сәлыңколт воссыг ат яласас. Саранпавылт мән нъяврам колт ос мөт мәт рүпитас. Нәг-хумыг хүрум нъяврам ян-малтасыг. Марина щар яныг, тав ёлы-пәлт кит әпщияге өлэг.

Марина Владимировна Саранпавылт школа әстламе юи-пәлт нъяврам ханищтан хөтпаг элаль ханищтахтүңкве ялыс. Ос ханищтахтаме порат хум вәрыс. Тувыл ханищтах-тын мәныл пөйтыс, пә-вылн юв минас. Ётыл

тав Уральский институт нәй харыгтан тәлан ханищтахтас. Та юи-пәлт тот инструкторыг нила-хуйплов тәл рүпитас. Тав ләвыс:

– Ам мән тәгыл нъяврамыт ханищтанкве сака кәсәщасум. Таимәгыс учи-телиг ханищтахтын кур-сыт әстласум. Ос нәй харыгтан мәныл пөхын минасум, нъяврам колн рүпитаңкве патхатасум. Овләт нъяврамыт ханищ-тан хөтпаг өлсум, аң яныг воспитателиг паттувәсум. Нъяврамыт өт рүпитаңкве әнумн сака мұсты.

Марина Владимировна омаге-әтяге саран хөтпаг. Тав саран ләтың моц вәг, ос ёмщакв ат потырты. Ущты щән ләтңе ёмщакв ханищтанкве патыстә. Аң ос нъявраманә саран мәхум өлнә-хүлнә вәр-малитн ханищтыяң. Тав Саранпавылт нъяврамыт мәгыс кит кружок вәрыс. Тав палтә школат бвыл классыт ханищтахтын әгит-пыгыт ос мән нъяврамыт ялантәгыт. Тот тә-наныл саран ләтңыл по-тыртанкве ханищтыяң.



М.В. Керцер

Тән сосса мәхум ос саран мәхум пәс йис блупса-ныл ханищтәгыт.

Нә ләвме щырыл, нила тәл ювле хультум порат тән «Тандора» нампa нъяврамыт үшләхтын мә щө-питасыт. Ты үшләхтын мә «Оленёнок» нампa садик колт вәрыглаве. Тот саран ос мәныщи мәхум кит культураг элаль тотавөг. Ты үшләхтын мә акв эт-пос мины. Сәт бвыл хөта-лыт нъяврамыт саран ос мәныщи мәхум тәнүтыт пәйтүңкве ханищтавет. Сәт китыт хөталыт нъяврамыт аны-сәныт мәщтырлэгыт, хүлуп сагёгыт, вәс имтат ос мөт пормасыт вәрөгыт.

Сәт хүрмит үшләхтын хөталыт тән сакныл хора-мыт хартәгыт, вөрүй ос сәлы совыт тынтлэгыт, юнсхатәгыт. Сәвсыр пор-масыт кәтыл мәщтыр-

лэгыт. Хумус тән бпаныл, щәщөкваныл өлсыт, та урыл потыртаве. Нъяврамытн тув ялантанкве сака мұсты. Мөтыт тәл туи по-рат ты үшләхтын мә юби-лейный ат тәлэ ёмты. Ты кастыл тән мүйлын вәр-малы тәстәгыт.

Марина Владимировна кит нъяврам янмалты. Әгитә яныг, вәт нупыл кит тәлэ төвлыс. Тав саран ләтың вәгтә, моц потыр-ты. Пыге ос онтолов клас-сыт ханищтахты, атхуй-плов тәлэ төвлыс, юн ома тән акваг нёты. Нә тав өс саран культуран ханищтытә. Ты щәмьа Коми республикат сәв рүт бныщи. Нә рүпататә щырыл тув мүйлуңкве хүрум щөс ялыс. Тот өлнә рүтанә өт вәщинтахты.

Николай МЕРОВ

<p>Лүймә сәрипос (Северная зоря) № 1 (1355), 15.01.2026</p> <p>Соучредители Дума, Правительство ХМАО – Югры</p> <p>Издатель Департамент внутренней политики ХМАО – Югры</p>	<p>Редакция</p> <p>ВРИО главного редактора – <b>Рагимов Н.В.</b> Телефон (3467) 33-17-52 (д 502)</p> <p>Заместитель гл.редактора – <b>Кондина Г.Р.</b> Телефон (3467) 33-17-52 (д 501)</p> <p>Ответственный секретарь – <b>Ромбандеева С.М.</b> Телефон (3467) 33-17-52 (д 507)</p>	<p>Адрес редакции и издателя: 628011, г.Ханты-Мансийск, ул.Комсомольская, 31 тел./факс (3467) 33-17-52 (д 510)</p> <p>E-mail: <a href="mailto:gazeta@khanty-yasang.ru">gazeta@khanty-yasang.ru</a> Газета размещена на сайте <a href="http://www.khanty-yasang.ru">www.khanty-yasang.ru</a></p> <p>Отпечатано: ООО «Печатный Мир. г. Сургут», ул. Маяковского, д. 14.</p>	<p>Индексы <b>04399, 54399</b> Тираж <b>1710</b> экз. Заказ <b>9</b></p> <p>Цена свободная Мнение авторов публикаций не обязательно отражает точку зрения редакции.</p> <p>Газета зарегистрирована Управлением Федеральной</p>	<p>службы по надзору в сфере связи, информационных технологий и массовых коммуникаций по Тюменской области, ХМАО-Югре и ЯНАО.</p> <p>Свидетельство о регистрации ПИ №ТУ 72-00795 от 23 января 2013 г.</p>	<p><b>12+</b></p>
---	---	---	--	---	-------------------